

խորտակին¹ ամենայն զաւրութիւնք նոցա, եւ լքանին: 12 Այլ մանաւանդ յորժամ յականջս կանանց եւս եհաս բան արանցն իւրեանց, եւ լուան թէ ողջ են,- քանզի եւ զհաւսս անգամ ի գիշերի զառն եւ զկնոջ խաւսէին նշանաւ դիւագգեցիկ արքն եւ հաւատալի առնէին,- չառնէին այնուհետեւ դուլ կանայքն ի տուէ եւ ի գիշերի², ըստ սայթաք եւ անհաստատ բնութեան կանանց, այլ գրգռէին զսիրելիս իւրեանց եւ զազգականս, զդայեակս նոցա եւ զծառայս՝ փութալ ճեպել հասանել վաղվաղակի եւ ածել զնոսա:

13 Եւ զայս ամենայն բանս դիւագգեցիկ արանցն եկելոց ի Վրաց, եւ զկամս եւ զհաւանութիւն³ բազում արանցն ի Յայ մարդկանէ, եւս առաւել զանդլութիւն կանանց եւ զճեպս եւ զանժուժկալութիւն, որ նման բոցոյ տոչորէին ի խորհուրդս նոցա, եւ ոչ որ զաւրեր ցածուցանել⁴, լուեալ ամենիմաստի⁵ եւ զգայուն մտաց Մամիկոնեանն Վահանայ զաւրավարին Յայոց՝ ասէր. «Այդ բանք եւ խորհուրդք՝ արանց վատախորհրդաց են եւ որք չարաչար են իմաստիւք: 14 Քանզի գիտացեալ զեկս պարսիկ գումարտակի զարնանի յերկիրս⁶ Յայոց՝ խորհեալ իմացան զայլ⁷, թէ քայքայել կարեմք եւ պառակտել զժողովումս զաւրաց Յայոց որ յոստանին էին, եւ այսր եւ անդր ցրուել. ապա թէ կարի սակաւ գունդ կայ ի Պարսից՝ թեպէտ եւ ձերբակալ արարեալ կորուսանեն զնոսա: 15 Այլ թէ ընդդէմ ոմանց բանքս իմ ոչ թուին⁸՝ ես աշխարհակորուստ արանցն ողջ ոչ տայի գնալ յաշխարհէս Յայոց: 16 Վասն զի զերանելի զեղբարն իմոյ զնահատակութիւն յաւուր կատարման իւրոյ, եւ յառաջ քան զպսակելն⁹ նորա տեսի զպսակն. եւ նախ քան զվախճանն՝ ցուցաւ ինձ գոյնն եւ կերպարան բանակի այնր եւ զաւրու, յոր բանակ նախադնելոց եւ վերանալոց էր. քանզի վաղագոյն քան զյարձակելն մեր եւ հասանելն առ միմեանս՝ լուսաւորեցան երեսք նորա լուսով, զորոյ զնմանութիւն լուսոյն ոչ կարեմ ասել. եւ զարմացեալ ընդ նորա տեսիլն՝ կամեցալ միւսանգամ հայել ընդ նա, եւ յեւս առաւել ճառագայթարձակ լուսոյ երեսացն զարհուրեալ՝ ոչ եւս կարացի հայել: 17 Որ թուի թէ եւ այլոց¹⁰ երեւեցաւ նոյն տեսիլ սքանչելութեան գունոյ նորա ի ժամուն. եւ ես անդէն եւ անդ

1 ՁԱՄ. խորտակի

2 ՁԱՄ. եւ կամ ի գիշերի

3 ՏՏ. զհաւանութիւնս

4 Ձ. ցածուցանել-ից յետոյ ունի. որոց աղօթիւքն ողորմի քրիստոս վարդան վարդապետի ծնողացն եւ ինձ մեղապարտ գրիգոր գրչիս եւ ձեզ ամեն:

5 ՁԱՄ. ամենիմաստի

6 ՁԱՄ. գումարտակի դառնան ի յերկիրս. այսպէս ըստ ուղղագրութեան ԲԳՄ.

7 Ձ. խորհել. թերեւս՝ խորհեալ իմացան զայս

8 ԳՄ. բանքս իմ թուին

9 Ձ. զպսակիլն, ի-ն թերուածի վրայ ՏՏ. զպսակիլն

10 ԱՄ. եւ թուի թէ այլոց. ԲԳՄ. եւ թուի թէ եւ այլոց